

Ta ansvar Lindås kommune!

Bygdene på Eikanger og Kløvheim ynskjer felles skule. Prosessen kring skulane våre har vore krevjande og utmattande, og er langt på overtid. Foreldrerepresentantar og kommunen har gjennom mange år nytta mykje tid og ressursar på skulesaka, og me ynskjer no ansvarlege politikarar som viser politisk handlekraft.

Ynskjer uansett ikkje skule i potensielle nye E39-traseer

Kvar ny trase E39 vert liggjande er ikkje viktig i denne saka. Det kom fram gjennom både synfaring og innspel at ny skule bør lokaliserast der folk bur, og ikkje ved industriområdet eller utmark. Forslag til skuletomt ved industriområdet og E39 er konfliktfylt, så innspela bør uansett leggjast bort.

I løpet av synfaringa som vi deltok på saman med administrasjon og konsultentselskapet, var dette eit viktig tema. Problematikken rundt E39 vart vurdert, men tomtealternativa som låg i på desse områda vart gjennom ulike vurderingar vurderte til å vera mindre eigna pga andre forhold som td topografi og tilkomst. Tomteforslaget som ligg nedanfor eksisterande E39, på Fyllingsnes, vart derimot vurdert til å ha gode kvalitetar også når det kom til plassering. Det kan sjå ut som desse viktige vurderingane ikkje har fått vere med å avgjere vegen vidare. Det er svær synd og urett dersom dette prosjektet skal bremsast pga problematisering kring plassering av ny E39.

Kvalitet og likeverdig skuletilbod

Skuleeigar har dei siste åra tatt ansvar for at dei aller fleste skuleborna i Lindås har fått, eller snart får nye skulebygg. Nye skuleanlegg med rom for å skapa gode læringsmiljø med vekt på å gje elevane skulebygg som skal fremje læring, gode tilhøve for sosialt samspel og utemiljø som fremjar lek og aktivitet.

På Eikanger skule har vi i dag mange dårlege kvalitetar når det kjem til desse faktorane. Gymsalen kan knapt reknast som noko gymsal. I alle høve vil ein ikkje kunne nå måla i læreplanen med desse tilhøva. Elevane våre har ein skule som manglar spesialrom. Skulekjøkkenet er brukt som klasserom, og det finst ikkje noko rom for kunst og handverk, eller musikk. Trafikktilhøva rundt skulen er svært vanskelege, og farlege situasjonar er ein del av kvardagen vår. Det er svært gode grunnar for at det i mange år har vore gjort vedtak om at våre to skular skal samlast i ein ny felles skule.

No MÅ de ta ansvar. Elevane våre har krav på eit likeverdig skuletilbod i denne kommunen. Det vil ikkje hjelpe elevane våre at det vert planlagt for flotte hall-fasilitetar på Ostereidet. I den nye oppvekstplanen er det særleg lagt vekt på at vi skal ha eit auka fokus på fysisk aktivitet kvar einaste dag.

Fyllingsnes ei framtidsretta løysing

Området kring tomten på Fyllingsnes har det klart største potensialet for befolkningsvekst i heile Eikanger/Kløvheim regionen. Ein ny og framtidsretta skule bør, etter vår meining, verte lokalisert i dette området. Vi har i mange månader opplevd å vera del av eit prosjekt med klare mål og fastlagt framdrift fram mot ny skule. Vi kan ikkje tru at all tid vi har brukt til møter og vurderingar også i denne omgang, har vore til inga nytte. Vi vart inviterte med i eit prosjekt som for første gong var konkret og målretta i høve til endeleg å kunna få realisert planen om ny skule. Vi ber om at politikarane tek ansvar for at vi kan komme i mål ein gong for alle. Konsekvensar ved å utsetje prosjektet vil vere store. Vi kan ikkje lenger sjå på at elevane våre lever med dårlege arbeidstilhøve på deira arbeidsplass. Vi kan ikkje vera utan ein konkret plan om at dei også snart skal ha eit skuleanlegg som fremjar helse, trivsel og læring. Dette kan ikkje setjast på vent. Du som politikar er skuleeigar og må ta ansvar for at elevane våre kan få ein trygg og god skule i nær framtid.

Helsing Skulegruppa Fau Eikanger skule